

Ho hlokahala ha Letona la Mehlang Pravin Gordhan, Lenqosa le Sebete la Ditshebeletso tsa Setjhaba

Tshwane, 13 Loetse 2024 - Kajeno ke letsatsi la mahlomola a maholo ka lebaka la ho hlokahala ha Letona le ratehang la Mehlang Pravin Gordhan, eo a neng a reneketswa ka la “PG” ke bongata ba rona, moetapele eo kabelo ya hae Ditshebeletsong tsa Lekgetho tsa Afrika Borwa (SARS) le setjhabeng sa rona e tlang ho dula e hopolwa ke meloko le meloko.

“Kabelo ya Pravin Gordhan ka mohlomong e keke ya utlwisiswa ka botlalo le ho ananelwa ke dimiliyone tsa Maafrikaborwa. Ho bao ba rona ba bileng le monyetla wa ho sebetsa ka katamelo le yena, ba ileng ba kgona ho mo tseba, re ithutile hore ke motho ya neng a ikemiseditse ho ba le kabelo ho tliseng diphetoho maphelong a Maafrikaborwa,” ana ke maikutlo a Khomishenara Ed Kieswetter nakong eo Pravin Gordhan a neng a kgethelwa ho ba Letona la Ditjhelete ka 2009.

Jwaloka Khomishenara ya SARS ho tloha ka 1999 – 2009, ke PG ya ileng a tla ka evangedi ya hore sena se bolela hore SARS e thehetswe morero wa Tshebetso e intshang Sehlabelo e kgontshang mmuso ho aha mmuso wa demokrasi o kgothaletsang kgolo e tswelang ya ikonomi mmoho le ntshetsopele ya setjhaba molemong wa Maafrikaborwa kaofela. Ke yena ya ileng a tataisetsa mokgatlo ona tseleng e ntseng e re kgothatsa le kajeno lena mme sena se tla dula se tswella mengwaheng e tlang. PG ntle le qeaqeo, ebile yena ya tllileng ka mohopolo mme a theha motheo wa Taolo ya Lekgetho le Bolaodi ba Meedi wa sekwalekwale.

Boetapele ba Pravin Gordhan le boitlamo ba hae bo sa thekeseleng tshebeletsong ya setjhaba bo siya nalane e kekeng ya hlakolwa lepatlelong la ikonomi ya Afrika Borwa. Jwaloka moetapele wa bohlokwa SARS, o etelletse pele maano le diphetoho tse ileng tsa ntlafatsa setheo, sa se fetola ho ba tshebeletso ya pokello ya lekgetho e hlomphehang lefatsheng ka bophara. Nako ya hae mona ebile ya boitelo bo sa thekeseleng ba botshepehi, puso e ntle, le boikarabelo, mme sena sa netefatsa hore SARS e ba tshiya e matla ya boemo bo botle ba ditjhelete tsa mmuso.

Ho feta tshebetso ya hae e bohlokwa mona SARS, o sebeleditse Afrika Borwa ka bohlwahlwa ka ho tshwarwa boetapele bo fapaneng, bona bo akaretsa ho ba Letona la Ditjhelete, Letona la Puso ya Kopanelo le Merero ya Setso mmoho le ho ba Letona la Dikgwebo tsa Setjhaba, moo sebete sa hae le ponelopele ya hae di ileng tsa tataisa naha ena ka dinako tsa mathata. Boitlamo ba hae bophelong bohle ba hae ba ho theha setjhaba se hlokanang leeme le sa toka bakeng sa bohle bo tla dula bo tlisa tjheso melokong e tlang ya basebetsi ba setjhaba le ho baetapele.

“Ke tla mo hopola jwaloka motho ya neng a ikemiseditse setjhabeng ya ileng a tella bophelo ba hae ho lwanela tokoloho le ho ntlafatsa bophelo ba Maafrikaborwa ka nako eo re neng re le dinaleng tse matla tsa kgapo ya mmuso, ke PG ya ileng a emela toka le tekano ntle le tshabo ya letho. O ne a bua ka sebete mabapi le seo a kgolwang ho sona ho sa natswe hore sena se ne se bakela yena le lelapa la hae eng.” ho rialo Khomishenara Kieswetter.

Re llela ho lahlehelwa ke morati wa sebele wa naha, mohlabani wa setjhaba le moetapele wa sebele. PG e ne e le mohale wa bophelo bohle wa tokoloho, ya ileng a lwantsha kgethollo ka sebete, lepatlelong la setjhaba le nakong ya pele ho demokrasi. Kamora 1990 ebile modulasetulo wa mmuso wa nakwana mme ebile karolo ya dipuisano tsa CODESA. Tema ya hae e tla dula e ntse e tataisa SARS le Afrika Borwa ha re ntse re hahamella puso e ntle le toka ho tsa ikonomi.

Re tla dula re hopola le ho rapella mosadi wa hae Vanitha le baradi ba hae Anisha le Priyasha, ba leloko le metswalle ba ileng ba fumana lerato le setswalle sa hae, mmoho le bohle bao maphelo a bona a ileng a angwa ke boetapele ba hae ba ponelopele mmoho le tshebeletso e tiileng ya setjhaba.

Afrika Borwa e tla dula e ananela ho intsha sehlabelo ha hae le tshebeletso ya hae ya bophelo bohle. Pravin Gordhan o dutse e le mohlabani ya bohale wa toka ho fihela qetellong. Moya wa hae o phomole ka kgotso.

“Re a leboha, Pravin, hamba kahle!”

Ho fumana lesedi le fetang lena, ikopanye le SarsMedia@sars.gov.za